


Vischnaunca da Medel/Lucmagn



**Ordinaziun concernent il survetsch da lavinas e
prighels dalla natira per la
vischnaunca da Medel/Lucmagn**

I. Determinaziuns generalas

Art. 1 Intent

Il survetsch da lavinias e prighels dalla natira, sco part dil stab directiv communal (SDC), ha gl'intent da segidar e cussegljar tenor situaziun e basegns, principalmein en cass da prighels dalla natira.

Art. 2 Pensums

¹ Ils pensums dil survetsch da lavinias e prighels dalla natira ein ils suandonts:

- a) exequir las lavurs necessarias tenor ordinaziun dil stab directiv communal;
- b) serrar vias communalas e sendas da viandar/gianellas tenor ordinaziun dil SDC;
- c) exequir evacuaziuns tenor ordinaziun dil SDC;
- d) exequir lavurs urgentas en muments critics tier malauras e prighels dalla natira tenor ordinaziun dil SDC.

² Il survetsch da lavinias e prighels dalla natira sustegn organisaziuns da salvament sco la colonna d'agid. Ein talas organisaziuns impedidas, surpren il survetsch da lavinias e prighels dalla natira l'organisaziun da salvament. En special:

- nominar in cumandant dil plaz;
- clamar il survetsch da sanitad (miedi, samaritans e.a.v.);
- recrutar in sufficient diember da gidonters;
- procurar pil material necessari;
- menar protocol;
- organisar il survetsch da midada.

Art. 3 Indemnisaziuns

¹ Ils funcziunaris dil survetsch da lavinias e prighels dalla natira vegnan indemnisai per lur lavur tenor las ordinaziuns valeivlas existentas dalla vischnaunca.

² Il diever da material, vehichels, maschinas, utensils etc. vegn indemnisaus conform allas tariffas usitadas dil liug, aschinavon ch'el ei d'attribuir allas ordinaziuns dil survetsch da lavinias e prighels dalla natira.

Art. 4 Disavantatgs

Disavantatgs che seresultan ord eventualas mesiras stipuladas da sforz (evacuaziuns, fermadas da vias etc.) dattan negin dretg sin cumpensaziun effectiva ni en daner.

Art. 5 Cuosts currents

Per cuvierer ils cuosts currents/cuosts da material preveda la suprastanza communalina in importo commensurau el preventiv da vischnaunca.

Art. 6 Responsablada

Il menader ed ils commembers dil survetsch da lavinias e prighels dalla natira san vegnir fatgs responsabels mo en cass da greva malprecauziun.

Art. 7 Radunonza generala

Il menader dil survetsch da lavinias e prighels dalla natira cloma el meins da november ad ina radunonza obligatoria per tuts commembers. Il genau cumpetent pren medemamein part a quella seduta.

La radunonza generala nominescha il menader ed il substitut dil survetsch da lavinias e prighels dalla natira per mauns dalla suprastanza communalina.

II. Organisaziun e subordinaziun

Art. 8 Survigilanza ed elecziuns

Il survetsch da lavinias e prighels dalla natira ei subordinaus alla survigilanza suprema dalla suprastanza communalina. Quella elegia mintgamai per ina perioda d'uffeci da treis onns il menader ed il substitut dil survetsch da lavinias e prighels dalla natira.

Art. 9 Responsabels

Il survetsch da lavinias e prighels dalla natira cumpeglia ils suandonts responsabels:

- menader
- substitut
- cau da material
- administraziun (canzlia communalina)

Art. 10 Menader dil survetsch da lavinias e prighels dalla natira

Ils pensums dil menader dil survetsch da lavinias e prighels dalla natira ein ils suandonts:

- a) l'observaziun da neiv e lavinias sco era d'auas grondas ed auters prighels dalla natira;
- b) informar e cussegljar il stab parzial per prighels dalla natira en cass da prighel;

- c) far part al stab parzial per prighels dalla natira;
- d) exequir las decisiuns dil SDC;
- e) survegilar las lavurs dil survetsch da lavinas e prighels dalla natira;
- f) organisar annualmein in exercezi obligatori pil survetsch da lavinas e prighels dalla natira;
- g) viers la suprastanza communal eis el responsabels per la cuntinuada prontadad persunala e pil material d'engaschament dil survetsch da lavinas e prighels dalla natira.

Art. 11 Substitut

¹ Il substitut representa il menader el cass d'absenza da tal.

² El ei responsabels per la registraziun dallas uras da lavur e pil rendaquen.

Art. 12 Cau da material

Il responsabel ei obligaus:

- ch'ei vegn menau in register da vart dil material disponibel;
- per la controlla dil material empristau;
- ch'il material da survetsch ei da tut temps preparaus;
- d'organisar tenor basegns material supplementar;
- da procurar per niev material tenor basegns.

III. Entrada en vigur

Art. 13 Approbaziun e vigur

¹ Questa ordinaziun passa en vigur cun l'acceptaziun dalla suprastanza communal. Ella remplazza il reglament concernent il survetsch da lavinas digl 1. da settember 2003.

² Questa ordinaziun ei vegnida approbada dalla suprastanza communal dils 27 d'avrel 2021.

Il president communal:

Il canzlist communal:

Rico Tuor

Valentin Pally